

四庫全書

史部

欽定四庫全書

史部

欽定八旗通志卷

一百四十八至
一百四十九

欽定四庫全書

欽定八旗通志卷一百四十八

人物志二十八

大臣傳十四

滿洲正黃旗二
布延 譚布

圖賴

馬福塔

舒里琿

努山

覺羅阿克善

賚圖庫

濟

席哈

圖賴

圖賴姓瓜勒佳費英東第七子也先隸鑲黃旗後
興兄納蓋弟蘇完顏改撥正黃旗天聰初隨征棟

夔追擊察哈爾及攻明寧遠所至有功三年從

太宗文皇帝伐明進兵燕京其大同總兵滿桂以師赴援

圖賴直前衝擊斬殺甚衆授騎都尉世職四年隨

大貝勒阿敏等鎮守永平明監軍道張春等圍灤

州圖賴與副都統阿山等率護軍自永平馳至乘

夜襲擊敗之師還貝勒阿敏棄永平出邊明將率

步卒百人邀擊圖賴率十六人還戰盡殲其衆尋

授三等輕車都尉五年八月從征大凌河圍其城

太宗指授方畧令與護軍統領南褚立兩旗之間遇逐我
樵採者邀擊之及明兵誘戰圖賴先馳入陣諸軍
各進戰圖賴被創

上以其違命輕進切責之九月明發援兵四萬餘來戰圖
賴統右翼兵躍馬衝陣敵兵潰走遂擒張春旋征
大同攻拔靈邱縣及小石城叙功晉二等六年大
軍破走察哈爾遂移師征明次於布里渡圖賴奉
命同叅領蘇喇達賚

敕諭明沙河堡守將明人遣官賁牛酒幣帛以獻七年隨
貝勒岳託等攻取旅順口其統兵守旅順者為漢
軍遊擊佟圖賴明年從攻朔州以越界出畧又不
至期會地盡奪所獲物入官九年任護軍統領隨
貝勒多鐸入廣寧同都統阿山等率兵四百先趨
錦州明總兵祖大壽遣其將合松山兵三千餘人
來禦未及戰明兵驚潰我兵分路勦翦俘獲無算
軍還叙功得優賞崇德二年授為議政大臣明年

復隨貝勒岳託征明率師先驅踰牆子嶺攻克十
一臺進兵山東明將合步騎八千來禦正紅旗隨
營蒙古阿藍泰旁却圖賴方營部馳擊敵以百騎
突至圖賴搏戰陷堅大敗之旋與都統譚泰敗明
閣部劉宇亮兵於通州河上攻拔二城又分兵畧
地取二城累功晉爵三等男六年圍錦州明兵自
杏山赴援擊敗之先是蒙古有降明者曰諾木齊
在圍中遣人約獻東關以降至是明兵覺圍諾木

齊家圖賴登城力戰殺敵出諾木齊以歸復破松
山騎兵指揮漢軍拔塔山杏山二城晉一等男部
議錦州之役諸貝勒所屬三旗護軍有退怯不戰
者貝勒大臣未經察治圖賴坐附和徇隱論罰贖
得

旨寬免八年攻拔中後所及前屯衛晉三等子順治元年
大軍至山海關流賊李自成遣兵拒戰圖賴率前
鋒軍破賊將唐通於一片石既入關破自成兵復

會大軍追敗之於望都縣超授三等公是年十月
豫親王多鐸帥師下河南自成走陝州圖賴自孟
津率精兵先渡河明守將黃士欣等各遁去瀕河
十五寨堡兵民望風歸附睢州總兵許定國等率
衆來降進薄潼關賊遣僞侯劉宗閔沿山列陣以
拒圖賴以騎兵百四十人進戰一以當百設伏掩
擊盡殪之明年賊將劉方亮整兵千餘來窺我營
圖賴與護軍統領阿濟格尼堪等率正黃鑲白正

紅鑲紅鑲藍五旗將領迎擊賊懼而奔俘斬甚衆
自成聞敗集兵拒敵圖賴復合鑲黃正藍正白三
旗兵力戰殲其步卒餘騎奔竄賊糾衆又至連戰
敗之遂破潼關賊衆大潰遁走陝西既定移兵收
江南攻克揚州獲明閣部史可法斬之追福王朱
由崧於蕪湖據江口截其路擊靖南伯黃得功兵
敗之得功中流矢死遂獲由崧餘衆悉降師旋進
爵一等公圖賴嘗謂睿親王多爾袞曰圖賴自誓

於天効忠

主上不避諸王貝勒大臣嫌怨久矣圖賴有過王若不言
將恐不免於罪戾我欲改過自新王幸毋姑息不
我教誡也會睿親王於午門集議譚泰擅隱

諭旨罪三日議未定圖賴面詰之曰何為遲久不結耶聲
色俱厲王怒曰爾曩追流賊至望都分兵前進諸
將爭先爾於肅豫諸王前誚讓且唾逞威自恣今
又以言詞逼我我固不能堪此怒色疾聲也遂去

諸王執圖賴將罪之王曰雖然此非退有後言比
且為國効勤矢忠無他咎也解其縛而釋之三年
任本旗滿洲都統隨端重親王博洛進師浙閩軍
次杭州時明魯王朱以海據紹興其總兵方國安
等營於錢塘江東岸艤舟以拒圖賴率諸將士從
上流浮渡江廣十餘里人馬無溺者分兵縱擊之
國安驚以為神盡棄戰艦攜魯王遁保台州圖賴
奮力追勦拔金華衢州各城會端重親王令與都

統漢岱分兵進師福建圖賴自衢州統所部兵擊
敗明閤部黃鳴駿於仙霞關攻克浦城漢岱亦自
廣信破分水關入崇安明唐王朱聿鍵遁走汀州
諸將乘勝追擊擒斬聿鍵等五人及其總兵等官
盡降其衆閩海悉平回次金華病卒年四十七子
輝塞罷爵圖賴既卒之後二年貝子吞齊等誣告
圖賴黨徇肅親王鄭親王又與譚泰等私相盟誓
睿親王追論之奪輝塞爵並沒其家

世祖章皇帝親政知圖賴無辜且

念舊功追謚昭勲配享

太廟

賜文勒石復輝塞一等公還其貲產雍正九年加號曰雄

勇

馬福塔

馬福塔滿洲正黃旗人姓納喇初任佐領與兄滿

達爾漢分轄所屬人戶

太宗文皇帝天聰五年授戶部叅政八年三月

命同戶部承政英俄爾岱責朝鮮國王李侖罪李侖引咎

報謝五月

太宗親統師征明大同馬福塔隨貝勒濟爾哈朗等留守

盛京九月賁奏

行營道出明鐵山路遇明兵邀拒者斬五人俘一人又馘

一人誠諭縱還遼人憚之尋擢戶部承政九年偕

叅政博爾惠賁

諭朝鮮自是通使朝鮮馬福塔輒奉

命往崇德元年復同英俄爾岱等使朝鮮明皮島兵遮於途盡擊走之還奏得

賜賚是年七月部議額駙佟養性嫁女與貝勒岳託子以六十人為媵戶部諸臣弗阻止馬福塔應革任罰鍰得

旨免革任九月以互市往朝鮮義州擒獲明哨卒知明兵入鰲場因率百人躡其後明兵遁值武英郡王阿

濟格等征明凱旋偕諸叅領渡遠河備舟艦十二

月

太宗以朝鮮背盟逆命將統師

親征先遣馬福塔同前鋒統領勞薩等將兵三百為賈人

裝晝夜疾馳將至國都其守將率兵拒戰我兵奮

擊盡殲之李侗為緩兵計遣其臣至郊外迎問馬

福塔答以有事欲議其臣曰為議事而來當啟知

吾王以禮相迎請少待遂閉門不納明日李侗遁

往南漢山城追至城下還奏

行營明年正月大軍破其國都進圍南漢山城馬福塔兩
奉

勅入城數李侗罪藁以輸誠納款侗先使其臣請罪隨率
羣寮出城乞降具表稱臣二月大軍凱旋李侗跪
送於十里外馬福塔復奉

命與英俄爾岱送李侗還李侗餽以金却之奏

聞四月隨武英郡王阿濟格证明皮島自北隅督戰大捷

六月法司議前征朝鮮時馬福塔擅攜其子隨往以俘獲諸物先衆賫歸又奪取降民鷹與貝子碩託索易婦人私令朝鮮將臣與碩託交結應奪俘獲論死得

旨免死罰贖十月復同英俄爾岱賫

勅封李侗為朝鮮國王三年正月戶部承政韓大勲盜取貯庫金銀珍珠馬福塔以同官弗舉坐罰鍰七月更定官制改授馬福塔為戶部左叅政四年正月

部議馬福塔購買官商胡有徵黃金負價未償應
革佐領降副理事官得

旨宥之六月同刑部叅政巴哈納賚

勅往朝鮮封李侗妻趙氏為王妃八月其兄叅領福爾丹
出征退縮伏法以所籍家產

賜馬福塔九月擢戶部承政十一月朝鮮頒

上恩德立碑三田渡具表以

聞

命與禮部叅政超哈爾等同往驗視五年二月卒子馬希
納襲管佐領

布延

布延姓郭爾羅特原籍蒙古居察哈爾部為塔布
囊天聰元年同昂坤社稷來歸隸滿洲正黃旗初
從征棟夔為貝勒岳託嚮導率先進擊又征克什
克騰部擊索諾木諾木齊兵首衝陣破之四年偕
叅領圖魯什畧明邊敗其哨卒有俘獲八年正月

偕圖魯什畧錦州松山斬百餘級獲樵車百餘牛
羸驢百四十

命以所獲賞將士十月畧十三站斬十級擒明把總一獲
馬三十二月遣迎察哈爾降衆是年叙來歸功授
騎都尉世職九年同布哈塔布囊畧寧遠俘獲歸
比出邊明兵千餘來追布哈陷於陣哈談巴圖魯
前行還戰馬中矢仆布延亟進援與之馬復同奮
擊大敗敵兵論功

賜人一馬二牛三授三等輕車都尉崇德元年二月

命齋書

諭明松棚路潘家口董家口喜峰口守將責明偏助葉赫

構起兵端及致書不答之罪五月隨武英郡王阿

濟格征明燕京遇敵盧溝橋敗之三年二月從征

喀爾喀前鋒將領勞薩達

上命得蒙古漢人收其財物牲畜縱之去論死布延議削

職鞭百贖身

上宥之七月擢議政大臣兼護軍統領九月隨岳託征明
由密雲東北牆子嶺毀邊牆入明馬步兵三隊俱
敗走布延追擊獲馬八十七四年率兵防守烏欣
河口偕侍衛阿爾薩蘭圍松山布延設伏擊斬二
十一級偵錦州斬哨卒八獲馬十二年隨睿親
王多爾袞圍錦州同左翼軍衝敵步營斬殺盈壕
六年三月以多爾袞違

諭離城遠駐又私遣軍士還布延不諫阻議削職籍其家

之半

特旨降罰未幾鄭親王濟爾哈朗克錦州外城布延同內

大臣伊爾登奮擊有功

賜百金晉二等輕車都尉時錦州之役多爾袞濟爾哈朗

更番相代明總督洪承疇率兵十三萬來援八月

上親統大軍征之明兵遁移

蹕松山環城浚壕夜明總兵曹變蛟衝圍突犯

御營尋中創奔回布延以內大臣不嚴防守論罰鍰七年

二月我軍擊擒洪承疇布延以援兵後至論死

命贖免十一月大兵自黃崖口征明分三隊布延率護軍

居次進圍薊州順治二年

世祖章皇帝念

太宗眷顧舊臣加布延一等輕車都尉五年從子烏納海

先時出征陣亡贈騎都尉其叔父桑阿爾齋襲職

至是卒併授布延襲晉三等男八年布延卒長子

莽塞襲踰年卒無嗣以布延兄阿拉克泰襲又卒

仍以布延次子茂奇塔特襲康熙三十五年從征
噶爾丹至昭莫多奮勇破賊有功加一雲騎尉授
二等男卒子成保孫松凌遞襲乾隆二十八年松
凌卒雲騎尉銷除子永泰現襲三等男

譚布

譚布滿洲正黃旗人姓舒穆祿揚古利從弟也初
任佐領天聰五年

太宗文皇帝統師征明園大凌河城明兵出城樵採譚布

時為護軍叅領率先邀擊斬三人生擒二人復同
佐領希福等擊敗明錦州援兵崇德二年列議政
大臣四年十一月奉

命隨承政薩穆什喀索海等征索倫部取道虎爾哈部同
諸將攻克雅克薩城獲丁壯三百餘索倫部長博
穆博果爾迎戰擊卻之護所獲以歸五年三月奏
凱分

賜貂皮人戶授騎都尉世職尋擢副都統時我兵屯田義

州譚布同副都統覺善等奉

命駐防其地值明兵突出山寨肆掠屯丁有被害者論駐
防諸將罪罰如例六年隨大軍圍明錦州掘長壕
駐守明總兵祖大壽遣步兵出城來犯護軍統領
噶布喇戰失利譚布衝入敵陣戰卻其衆復擊敗
敵騎斬其材官一明總督洪承疇集衆松山援錦
州譚布隨其兄都統譚泰迎擊破其步兵三營既
而敵騎屢犯我右翼營譚布皆奮戰挫敵明年叙

功加一雲騎尉

上幸牧馬所

命諸大臣與降將祖大壽等較射獎賞有差譚布得

賜駝一八年正月

命同覺善率兵駐守錦州九月隨鄭親王濟爾哈朗征明
寧遠敗其拒戰兵

世祖章皇帝順治元年隨大軍入山海關擊敗流賊李自
成追至望都晉世職為二等輕車都尉二年隨饒

餘郡王阿巴泰鎮守山東勦平滿家洞賊巢同都
統準塔進征徐州連敗明兵獲船五百餘紅衣礮
五十有七時豫親王多鐸統師自河南進征由泗
州渡河趨揚州下江寧而明總兵劉澤清總漕田
仰等尚距淮安譚布同準塔率兵至清江浦澤清
及仰俱遁遂定淮安招降附近城邑分兵勦平如
臯通州賊衆叙功晉一等輕車都尉加一雲騎尉
三年隨肅親王豪格征流賊張獻忠屢擊敗拒戰

賊衆五年凱旋以在軍中時不勘決叅領希爾根
爭功狀議罰

上命寬免六年隨端重親王博洛討叛鎮姜瓖圍大同城
瓖潛結賊黨外援倚北山逼我軍自糾衆出城來
犯譚布同護軍統領鰲拜車爾布等先破賊援還
擊卻瓖入城斬殪甚衆又分兵勦滅賊黨於太原
平陽汾州先是譚布以不禁其妻信魔魅術削雲
騎尉遇

恩詔復之及大同平叙功晉三等男世襲復兩遇

恩詔晉一等男八年三月擢工部尚書時譚泰任吏部尚

書專擅是年八月伏誅

詔免其兄弟連坐罷譚布尚書任尋

甄別譚泰任吏部時援

恩詔優加世職譚布仍降三等男康熙四年卒子喀岱襲

爵

伊爾德

伊爾德滿洲正黃旗人姓舒穆祿揚古利族侄也

天聰三年

太宗文皇帝命揚古利率師畧明錦州寧遠諸邊境伊爾德從軍有功復從大軍征明北京奮勇攻擊斬殺甚衆又敗山海關援兵於薊州師還出邊先至木城擒斬明兵之守隘者五年

上帥諸貝勒大臣攻圍大凌河城中兵突出伊爾德衝鋒入陣殺敵二人都統和碩圖等合師夾擊追奔至

壕而還又擊明監軍道張春兵遇敵騎挾弓矢將犯

御營伊爾德馳斬之是秋往畧前屯衛率十五人偵緝明哨卒值我軍將領噶思哈為敵兵所困伊爾德奮擊援出之積功授騎都尉世職尋擢護軍統領崇德二年隨貝勒阿巴泰往築都爾弼城率護軍四百人防護築城工役五年五月大兵圍錦州敵兵出戰伊爾德領轟追擊至壕敗之七月隨王貝勒

等至錦州松山屯田明人縱牧於野伊爾德設伏於烏欣河驅其牲畜以歸敵兵潛襲我後伊爾德率後隊還擊斬獲無算特晉爵三等男十一月以擅離營汛私往貝子尼堪家又向王貝勒及護軍校索馬擅遣其子額爾畢黑隨叅領希爾根往錦州部議應降職明年奉

命往睿親王軍營傳諭通察各旗將領事不即奏報部議削爵籍家財之半均得

晉蜀賸七年復從圍錦州敗松山兵之來奪我礮者叙功

晉一等男順治元年駐防錦州二年加一雲騎尉

世祖章皇帝命伊爾德隨豫親王多鐸南征同尚書宗室

漢岱等統蒙古兵由南陽趨歸德招撫甚衆至揚

州城北獲戰艦百餘渡江先八旗都統進破南京

福王遁走蕪湖復同都統阿哈尼堪等追擊之敗

明靖南伯黃得功軍三年叙功晉二等子六年與

都統譚泰征江西叛鎮金聲桓平之進勦廣東叛

鎮李成棟於信豐拔其城成棟夜遁馬蹶溺水死
隨分兵定撫州建昌破偽總兵楊奇盛兵二千餘
江西悉平師旋復奉

命統領將士往勦保定土寇叙功晉一等子八年八月護
軍統領鰲拜計伊爾德罪狀以

上幸南苑時伊爾德擅令內直員役更番及私減守門護
軍額數又嫉忌鰲拜等為

上効力鞠實論死籍其家

上貸之

命削世職一級留任罰贖十一月擢本旗都統明年三遇恩詔晉一等伯兼一雲騎尉隨敬謹親王尼堪征湖南敗

績十一年師旋論罪革職籍沒是時明魯王朱以

海為鄭成功所殺其餘黨竊據浙江舟山為寇十

二年

上命伊爾德為寧海大將軍統兵往剿至則偽總兵王長

樹毛光祚沈爾序等糾賊登岸肆掠大嵐山伊爾

德遣副都統碩祿古總兵張承恩引兵趨夏關抵
斗門連擊敗之斬長樹等三人殲賊兵無算而自
率師攻寧波乘舟趨定海分三路進發賊將陳六
御阮思等於海島望江口山下列戰艦以待伊爾
德揮衆進擊敗之追至衡水洋斬六御等遂取舟
山十四年凱旋

命貝勒杜蘭等郊勞復世爵叙功晉一等侯兼一雲騎尉
十五年隨信郡王多尼征明桂王朱由榔自貴陽

至盤江斬其將領進克雲南省城十八年卒於軍
年五十六

子祭葬如典禮謚襄敏子陀和齊早卒孫巴渾岱襲

滿達爾漢

子阿哈丹

滿達爾漢姓納喇先世居哈達父雅虎率十八戶
來歸

太祖高皇帝命為佐領隸滿洲正黃旗列理事十大臣嘗
同大臣哈穆達尼征東海卦爾察部俘二千人以

歸

命設宴郊勞之又以克舒桑哈達功

賜俘獲人百既乞休滿達爾漢襲管佐領事從

太宗文皇帝征虎爾哈部招降五百餘戶天聰五年五月
命賚

勅往朝鮮

諭以征明海島令供備舟艦時朝鮮初附懷反覆滿達爾

漢既至國王李倬遣兵守其館弗與見越三日滿

達爾漢謂守者曰我奉

命賁

諭至此何慢我不相見我歸矣遂偕諸使臣控騎行李侗
使侍臣追及以願見請乃致書而還七月授禮部
叅政閏十一月復同文臣庫爾禪等責朝鮮縱匪
越境隱匿逃人諸罪李侗乃引咎願輸忱入貢八
年

太宗親征明至大同滿達爾漢分兵克四堡一臺又攻王

家莊拔其城叙功授騎都尉世職尋擢禮部承政
復奉使朝鮮崇德二年隨武英郡王阿濟格征明
攻克皮島

賜白金裘馬三年更定官制六部承政各留一員餘皆改
為叅政滿達爾漢仕承政如故七年五月

命同大學士范文程等宴明國和議使臣順治元年

世祖章皇帝定鼎京師滿達爾漢以年老解部務專仕佐
領二年晉世職三等輕車都尉遇

恩詔晉二等尋卒

賜祭葬如典禮謚敬敏立碑墓道第十子阿哈丹襲職兩

遇

恩詔晉一等輕車都尉兼一雲騎尉以一等侍衛從征福

建擊海寇於廈門陣亡康熙二年

卹贈三等男以其子武格襲

舒里琿

舒里琿滿洲正黃旗人姓棟鄂先世居瓦爾喀祖

喀喇當

太祖高皇帝時率族來歸以從征有功授佐領

賜號巴圖魯天命四年與明總兵劉綎戰身被七創後以

創發卒父札福尼

太宗文皇帝天聰四年隨大兵征明灤州我兵三人被執

札福尼衝陣力援之出叙功予騎都尉世職八年

十二月隨步軍統領巴奇蘭等征黑龍江有功加

一雲騎尉崇德八年卒舒里琿襲職舒里琿初任

護軍校天聰五年從征大凌河城內蒙古兵出戰
舒里琿擊卻之

世祖章皇帝順治二年隨英親王阿濟格征流賊李自成
至延安府七戰皆捷自成遁湖廣追躡至安陸府
獲賊船十有四三年蘇尼特部騰機斯叛舒里琿
隨豫親王多鐸往征斬獲無算並擊敗喀爾喀土
謝圖汗及碩類汗兵師還授佐領六年隨端重親
王博洛征大同叛鎮姜瓖擊敗偽巡撫姜建勲等

十一年擢護軍叅領十五年任正黃旗滿洲副都
統隨信郡王多尼征雲南擊李成蛟於涼水井追
至雙河口敗李定國兵凱旋晉三等男十八年八
月卒子穆里琿襲爵舒里琿之弟洛多歡天聰七
年隨貝勒岳託征明旅順口克其城崇德六年圍
錦州敗明總督洪承疇兵七年隨貝勒阿巴泰征
明攻順德府城先登取之

賜號巴圖魯予三等輕車都尉世職後遇

恩詔晉至一等輕車都尉兼一雲騎尉順治十七年卒以

札福尼第四子崆古圖襲職崆古圖初隨靖南將軍
辰泰征福建先登克興化城由護軍校游擢叅
領

聖祖仁皇帝康熙十三年隨副都統雅賚阿喀尼等征逆
藩耿精忠由安慶進江西敗賊於小孤山復彭澤
宜黃崇仁樂安等縣十五年移師征逆藩吳三桂
擊敗賊將夏國相於萍鄉進征湖南十八年敗賊

將吳國貴於楓木嶺復武岡州尋還京二十四年
卒子多博海襲職舒里琿之孫特爾勤穆里琿之
次子也任佐領康熙二十年隨征南大將軍賚塔
征逆孽吳世璠敗賊將何繼祖等奪石門坎黃草
壩乘勝拔嵩明州城直抵雲南省復隨都統希佛
擊敗賊將馬寶於烏木山又追蹙賊將胡國柱於
雲龍州叙功予騎都尉世職四十一年卒子素爾
禪襲

努山

努山滿洲正黃旗人姓札庫塔世居鄂里父塔克都當

太祖高皇帝時率衆來歸後

命其長子瑚什屯轄其衆為佐領積功授三等輕車都尉
世職無子以努山之子渾岱為子瑚什屯既卒渾
岱襲職努山代理其事每從征伐輒先驅覘敵有
斬獲授前鋒叅領天聰八年五月

太宗文皇帝嘉其能事

諭羣臣曰姪不如弟親以渾岱所襲職改

命努山襲之八月

太宗親征明大同努山同叅領席特庫納海擒明哨卒以

獻崇德元年六月率甲士偵明邊境至冷口遇哨

卒十四人斬三人生擒一人獲馬十餘三年隨貝

勒岳託征明將入邊斬首四十級俘三人發敵所

伏火藥五處至密雲東北牆子嶺明薊遼總督吳

阿衡率步騎六十拒戰既擊敗之復與前鋒統領
勞薩等乘勝追擊潰卒獲馬數十及軍械礮具進
薄燕京明以騎兵五百設伏謀襲我軍太監高起
潛又率兵躡我軍後努山與勞薩擊走伏兵旋自
設伏道側以少卒誘起潛戰夾擊之斬獲甚衆是
夜起潛復襲我前鋒營努山與叅領鄂允席特庫
合兵奮擊大破敵衆追抵會通河溺死者無算遂
次涿州分路畧地並隨睿親王多爾袞至山東克

濟南府振旅出邊同勞薩擊谷口步軍敗之六年
七月與侍衛穆章等率兵偵敵董家口喜峰口斬
級百餘生擒四人是年從大兵圍錦州明援兵踵
至

太宗自將擊之陳師松山杏山間敵騎兵犯我前鋒努山
力擊斬首五十有二獲馬三十明總督洪承疇悉
衆來戰努山與勞薩等陣而前戰良久會王貝勒
等各率所屬兵至合擊之大破其衆追至城塹而

還十月擢前鋒統領尋奉

命馳赴杏山是時武英郡王阿濟格駐兵杏山河岸敵以
千騎自寧遠來窺猝遇努山驚潰努山追敗之於
連山斬級三十獲馬三十二七年三月略明寧遠
有中後所敵騎五十犯我牧地即率前鋒兵縱擊
並敗其援兵四百寧遠守將背城而陣努山與前
鋒統領吳拜破其陣生擒二十三人是年叙功晉
二等輕車都尉八年四月

太宗以貝勒阿巴泰等征明山東未還

命努山偕叅領四侍衛四率兵九十至界嶺口偵大軍距
邊遠近遇明兵邀戰斬其守備及步騎三百餘生
擒數十人獲馬羸牛二百餘還奏

命以所俘獲分賚從征將士八月同護軍統領阿濟格尼
堪率兵駐防錦州順治元年

世祖章皇帝定鼎燕京

命努山統左翼前鋒隨豫親王多鐸追勦流賊李自成至

陝州距潼關二十五里賊據山為陣謀拒我師努
山率兵由間道趨賊營斬獲過半賊潰竄二年移
師定河南下揚州進克江寧明福王朱由崧遁走
努山與諸將追擊於蕪湖殲敵甚衆由崧為其總
兵田雄等執以獻三年隨貝勒博洛征浙江明總
兵方國安列營錢塘江東岸分布舟艦來犯努山
與都統圖賴徑渡上流悉精銳擊之國安望風驚
潰盡獲其舟艦遂進征福建斬其巡撫楊廷清李

暄芬時護軍統領都爾德等攻下建寧延平明唐
王朱聿鍵走汀州努山馳七晝夜追及則已閉門
堅守乃令銳卒用巨木撞之門闕壞大軍並進遂
擒聿鍵五年隨鄭親王濟爾哈朗征湖廣時明桂
王朱由榔據廣西其總督何騰蛟總兵王進才馬
進忠袁宗第等猶踞湖南郡邑六年正月努山至
長沙同右翼前鋒統領席特庫簡精銳趨湘潭遇
迎戰者輒擊敗之與都統阿濟格尼堪等破北門

入騰蛟就擒四月同兵部尚書阿哈尼堪等徇寶慶距城七十里進才進忠糾衆抗拒努山令軍士舍騎步行連戰皆捷直薄城東門進才等潛遁追勦至武岡殲進忠所屬步卒三千連破進才宗第等十餘寨分克沅州靖州進定全州擒斬其閭部楊鰲及副將叅將等官四十餘人俘獲無算七年九年三遇

恩詔晉爵二等男世襲十三年擢內大臣十五年九月卒

賜卹如典禮立碑墓道子托岱襲爵

覺羅阿克善

覺羅阿克善滿洲正黃旗人

景祖翼皇帝兄索長阿之三世孫也崇德六年以叅領隨

大軍征錦州敗明總兵吳三桂及松山杏山援軍

師還副都統索海為敵所襲阿克善同護軍統領

伊爾德往援奮擊卻之又隨大軍連敗明總督洪

承疇兵授雲騎尉世職八年鄭親王濟爾哈朗征

明寧遠分兵攻前屯衛阿克善先登克其城晉騎

都尉

世祖章皇帝順治元年隨睿親王多爾袞入山海關擊敗
流賊李自成叙功加一雲騎尉遇

恩詔晉三等輕車都尉七年三月擢正黃旗滿洲副都統
七月兼任工部侍郎八年調兵部再遇

恩詔晉世職至一等輕車都尉九年同都統噶達渾征勦
鄂爾多斯部叛逃蒙古多爾濟等殲其衆於賀蘭

山初興安總兵任珍以家屬淫亂擅殺多人賄囑部臣寢議十年春事覺降阿克善世職為騎都尉兼一雲騎尉解兵部任管副都統事如故十一年七月署都察院左都御史尋仍專任副都統隨征湖廣敗賊兵於湘潭常德龍陽十三年鄭親王世子濟度征海賊鄭成功阿克善率兵從大軍至烏龍江以水險難渡乃潛取道山間徑趨福州未至聞鄭成功在高齊即分兵令佐領褚庫等先往迎

戰擊走賊衆千餘又分遣署護軍統領伊巴克圖
率兵往侯官征勦水路賊衆敗之遂至福州偵知
賊船三百餘尚泊烏龍江阿克善自由水路約營
總星鼐等由陸路合擊追至江口擒偽都督總兵
等俘獲甚衆明年賊犯羅源縣我駐防兵被圍阿
克善率兵赴援遇賊力戰陣亡十六年三月晉三
等輕車都尉世職子塞克森襲

賚圖庫

賚圖庫姓顏扎世居葉赫父安達哩於

太祖高皇帝時來歸予騎都尉世職隸滿洲正黃旗屢從
太宗文皇帝征明積功至三等輕車都尉及

太宗升遐安達哩號呼累日以殉

世祖章皇帝特予三等男爵世襲罔替以其子賚圖庫襲
賚圖庫初任侍衛天聰五年從

太宗征明圍大凌河城同佐領尼塔哈畧錦州城內突出
兵五千餘搏戰賚圖庫擊敗之復同尼塔哈破明

監軍道張春兵崇德元年從征朝鮮途遇朝鮮騎
兵千餘偕衆擊卻之三年隨貝勒岳託征明至通
州遇明兵臨河列營同佐領瑚彌色擊敗其衆進
兵山東至濟南府敵兵五百迎戰賚圖庫率護軍
奮擊斬二十餘級獲馬十六師旋復破敵營於臨
清城西六年從征松山明總督洪承疇引兵十餘
萬拒戰我兵既擊敗之其總兵曹變蛟使潰卒乘
夜突犯

御營賚圖庫奮力捍禦手斬一人餘衆悉遁竄尋隨鄭親
王濟爾哈朗敗明杏山兵斬馘甚衆又設伏於高
橋敵乘夜來犯擊却之斬騎兵二人射殪五人生
擒二人順治元年隨大軍入山海關擊敗流賊李
自成叙功並屢遇

恩詔晉爵至一等子九年正月

世祖追念賚圖庫之父安達哩忠悃久著

特命立碑墓道三月以賚圖庫列議政大臣尋擢內大臣

兼佐領

聖祖仁皇帝康熙十二年

諭獎久著勞績諸大臣加賚圖庫太子少保二十二年十

月卒

賜祭葬如例孫錫喇襲

濟席哈

濟席哈滿洲正黃旗人姓富察佐領本科里之次

子也初任佐領

太宗文皇帝崇德四年擢授護軍統領五年隨鄭親王濟爾哈朗征明錦州遇松山兵邀戰同叅領布丹希爾根囊古等擊却之尋駐義州衛我兵屯田

上誡諭諸將勿與敵迎戰惟固守營壘俟敵近乃禦擊會敵猝犯鑲藍旗營濟席哈越鑲紅旗營助戰以擅離汎地論罪籍家財三之一罷護軍統領旋奉

命同副都統席特庫率護軍並外藩蒙古兵征索倫部擒部長博穆博果爾並獲其家屬人衆及馬牛數百

六年正月凱旋

遣官迎於北驛館

賜宴勞之是年復隨鄭親王圖錦州屢擊敗松山敵兵七年授正紅旗蒙古副都統八年兼任戶部叅政

世祖章皇帝順治元年大兵入山海關濟席哈同都統恩格圖擊敗流賊李自成追至望都叙功授騎都尉世職二年隨端重親王博洛征浙江既下杭州以副都統駐守時明福王朱由崧已滅其大學士馬

士英總兵方國安據嚴州糾衆二萬餘屢犯杭州
濟席哈督兵禦擊五戰皆捷尋還京仍任工部侍
郎四年考滿加一雲騎尉五年三月

命率兵駐防東昌府尋以海賊鄭彩等寇掠福建移兵隨
靖南將軍辰泰征勦賊據長樂連江同安平和等
縣並合兵攻復之叙功晉二等輕車都尉七年四
月調刑部侍郎十二月遷本部尚書兩遇

恩詔晉爵三等男九年授正紅旗蒙古都統仍兼刑部尚

書列議政大臣十年三月解尚書任九月膠州總
兵海時行叛濟席哈奉

命與副都統瑚沙率兵往勦師未至時行奔宿州漕運總
督沈文奎與山東總督馬光輝合兵勦擊時行窮
蹙降伏誅

詔濟席哈移兵鎮守湖南十一年

召還復署刑部尚書尋仍

命專管都統事十四年四月調滿洲都統十二月

命率副都統四員護軍叅領八員赴寧南大將軍宗室羅託軍前証明桂王朱由榔十五年大兵三路並進上以征南將軍卓布泰自廣西征貴州所部兵較少

命濟席哈率領將士助之遂進次都勻連敗其晉王李定國之兵合湖南四川兩路師攻克雲南城遂由榔入緬甸十六年

頒賚有功諸將濟席哈得

賜蟒服鞍馬十七年以勘勒隨征將士功罪不實降世職

為一等輕車都尉停其叙功十八年山東土賊于
七糾黨據棲霞縣之岬嶠山出掠郡邑

聖祖仁皇帝命濟席哈為靖東將軍率兵圍其山寨斬賊
無算于七竄入海賊平康熙元年五月班師八月
卒

賜祭葬如例子阿祿襲職六十年阿祿任西安副都統上
疏為濟席哈請謚

允之追謚勇壯

欽定八旗通志卷一百四十八

欽定四庫全書

欽定八旗通志卷一百四十九

人物志二十九

大臣傳十五

滿洲正黃旗三
坤 遜達哩

費雅思哈 額參
達理善 根特

卦刺
默訥

圖刺

沃內

喀蘭圖

圖海

覺羅武

費雅思哈

費雅思哈滿洲正黃旗人姓富察佐領本科里之

第三子也初任護軍校天聰六年

太宗文皇帝親征察哈爾分兵略明大同至朔州城中兵出戰費雅思哈與叅領道喇等奮擊敗之崇德三年署護軍叅領隨貝勒岳託征明入牆子嶺敗密雲步兵五年大軍圍錦州明兵自松山杏山赴援費雅思哈禦戰皆捷六年復圍錦州同叅領哈寧阿擊敵城下射殪二人明總督洪承疇以步隊自松山來犯費雅思哈力戰卻敵

世祖章皇帝順治元年隨睿親王多爾袞入山海關敗流

賊李自成又追敗之望都是年冬授護軍叅領隨英親王阿濟格西勦自成明年春次榆林賊乘夜襲我營費雅思哈同護軍統領車爾布等擊之走窮追自成至武昌連破賊營復率舟師敗賊於富池口獲賊船三十三年隨肅親王豪格征流賊張獻忠過西安分兵剿賊邠州賊渠胡敬德率衆千餘踞三水縣西北山岡費雅思哈同護軍統領噶達渾破賊寨復同都統巴哈納擊敗叛鎮賀珍於

雞頭關進師四川屢與獻忠賊黨戰斬獲無算正
藍旗官軍為賊所困同噶達渾超援賊敗遁先是
叙入關功予世職騎都尉及獻忠滅加一雲騎尉
六年隨英親王討大同叛鎮姜瓖掘壕圍城偽總
兵楊振威率步騎萬餘來犯費雅思哈先衆迎戰
卻賊入城時賊黨分踞左衛復陷汾州窺太原費
雅思哈先後率護軍勦賊所至克捷尋復會大軍
圍大同賊勢蹙振威斬瓖首出降乃班師三遇

恩詔晉世職至一等輕車都尉十三年擢護軍統領列議
政大臣尋率兵赴湖南駐防時獻忠餘黨孫可望
踞辰州費雅思哈同都統卓羅副都統泰什哈等
由澧州常德進征賊棄城遁縱火焚其船以阻我
軍費雅思哈取其未及焚者以濟師攻發賊伏躡
擊至瀘溪殲賊甚衆十八年隨定西將軍愛星阿
勦明桂王朱由榔於緬甸緬人執由榔以獻

聖祖仁皇帝康熙元年凱旋敘功晉爵三等男十一年五

月卒

賜祭葬如典禮謚僖恪子蘓丹襲爵別有傳

額參

額參滿洲正黃旗人姓吳雅父額伯根

國初來歸額參初授膳房總領歷任內大臣崇德元
年十二月從

太宗文皇帝征朝鮮適朝鮮遣人致書于明額參遇而射
之立斃

詔嘉其能即以其人所乘馬

賜之二年正月同額駙公揚古利率兵大破朝鮮于南漢
城追入山敗卒伏崖間竊發鳥鎗中揚古利歿尋
有越山去者或言彼即傷揚額駙者也

上命額參追之次日以其首來獻

諭獎之三年隨睿親王多爾袞征明至山東克濟南臨清
還攻大同均在事有功授世管佐領卒長子魏武
官至護軍叅領是為

孝恭仁皇后之父雍正元年

敕曰額栢根係本朝舊族創業名家在

太祖高皇帝時撫育禁庭視同子姪額參歷事三朝軍功

懋著魏武天挺俊傑啟後承先厚德鍾靈篤生

聖母宜加峻秩以協彝章俱著追封一等公即以魏武子

博啟承襲並令世襲罔替乾隆十八年博啟卒子栢永

襲一等公二十三年以病解任子西銘襲一等公

乾隆四十三年奉

旨向來后族承恩世襲俱係一等公此等特因椒房至
戚恩澤加封以視佐命功臣櫛風沐雨拓土開疆者
實難並論況宗室王公以近支恩封者尚以世次遞
降而外戚轉得崇封延世未免過優着俱改為三等
公世襲罔替于是西銘改三等公四十六年授蒙古
正黃旗副都統四十八年授內大臣四十九年九
月出使朝鮮五十年正月舉行千叟宴西銘未還

京

特命給賞七月授江寧將軍五十二年卒於任

坤

坤姓那木都魯先世居瓦爾喀之綏芬父伊訥克
當

太宗文皇帝征瓦爾喀時先衆迎降遂挈家來歸隸滿洲
正黃旗天聰八年授雲騎尉世職尋卒坤襲之洊
擢一等侍衛兼管佐領事崇德六年從

上征明錦州圍松山城明總兵曹變蛟集衆乘夜犯

御營突衝正黃旗營門諸侍衛及親軍等皆散列門左右

坤獨立門中力戰卻敵

上嘉其勇敢

賜號巴圖魯

賚白金四百兩超晉一等輕車都尉世職

世祖章皇帝順治二年敘錄

太宗著顧諸臣各予世職加坤一雲騎尉嗣屢遇

恩詔晉爵一等男兼一雲騎尉十年

上以坤嘗奉遣祭

昭陵辭不往扈

蹕南臺不入直又擅娶

賜配有屬之女子為妻下內大臣鰲拜等議罪應死籍沒
詔從寬罷任仍留一等男爵尋復一等侍衛十一年隨靖

南將軍珠瑪喇征廣東署都統事時流賊張獻忠

餘黨李定國附明桂王朱由榔自廣西犯廣東據

新會縣左之山峪坤率兵與諸軍合擊大破之追

勦至橫州江岸斬賊無算敘功加一雲騎尉十五年授散秩大臣尋擢內大臣

聖祖仁皇帝康熙十二年

諭獎久著勞績諸大臣加坤太子太保是年冬逆藩吳三桂反明年九月

詔以河南地廣兵少恐奸宄乘間竊發授坤振武將軍率兵駐防汝寧十二月陝西提督王輔臣叛於寧羌踞秦州

詔坤移兵赴西安十四年正月

詔同副都統翁愛等進守漢中先是定西大將軍貝勒洞
鄂由漢中進征保寧聞王輔臣叛還西安令將軍
席卜臣等率兵二千守漢中至是輔臣糾叛黨毀
鳳縣之偏橋阻我餉運復截踞棧道斷漢中聲援
坤以疏

聞

諭趣開棧道以援漢中坤進次寶雞因道阻駐兵

詔罷坤將軍任以內大臣留貝勒洞鄂軍供調遣六月大
軍復秦州坤同將軍佛尼勒追勦賊衆連戰皆捷
復禮縣清水伏羌西和等城時席卜臣等因漢中
乏饟不能守率兵乘間還西安十七年

詔趣大軍規復漢中以坤同副都統馬一豹等守潼關十
八年因坤年老

召還京二十二年議政王大臣等追論坤奉

命援漢中頓兵不進雖有勞績未足抵罪應罷黜官爵及

加銜並削巴圖魯號

上曰巴圖魯號

太宗文皇帝所賜其勿削並留一等輕車都尉世職二十

四年

上念坤宣力有年雖軍中獲罪事非由已起授散秩大臣
並

諭以年已衰邁如不能入朝聽其家居二十五年卒

賜祭葬如例孫顯圖襲世職

遜達哩

遜達哩姓魯布哩世居葉赫

太祖高皇帝取葉赫籍其人戶分隸八旗遜達哩隸正黃旗滿洲尋選充驍騎每隨征輒奮勇爭先中創不退屢得

優賚

太宗文皇帝崇德三年隨睿親王多爾袞征明由青山口入邊越燕京轉戰至山東攻克濟南府城明年四

月凱旋論先登功第一

賜號巴圖魯予二等輕車都尉世職兼管佐領

世祖章皇帝順治七年授兵部理事官八年遷護軍叅領

三遇

恩詔晉爵至二等男十二年擢正黃旗滿洲副都統十六

年遷護軍統領先是流賊李自成竄死其黨散處

楚蜀至是餘孽劉二虎郝搖旗李來亨袁宗第等

猶聚匿歸州興山間

聖祖仁皇帝康熙二年以都統穆哩瑪為靖西將軍都統
圖海為定西將軍統八旗兵赴湖北會合陝西四
川兵勦賊

命遜達哩領護軍以隨直抵茅麓山破賊巢二虎來亨自
經死搖旗宗第就擒餘賊悉平乃班師十二年

諭獎久著勞績諸大臣加遜達哩太子少傅十四年四月
卒年七十有三

賜祭奠如典禮謚果壯子杭書襲爵改隸鑲白旗

達理善

達理善滿洲正黃旗人姓那木都魯

國初有綏芬路長明安圖巴顏之族岳蘇納者同族
衆來歸達理善其四世孫也崇德三年以閒散隸
驍騎營隨睿親王多爾袞征明越北京攻山東濟
南府以雲梯先登第三克其城

賜巴圖魯號授三等輕車都尉世職六年隨大軍圍錦州
進擊明總督洪承疇援兵于松山杏山間連敗敵

衆順治元年秋隨都統葉臣征山西攻克太原二年冬隨副都統珠瑪喇和託等駐防杭州先是明福王朱由崧就擒其大學士馬士英竄杭州總兵方國安守嚴州及大兵定杭州馬士英走依方國安糾衆來犯達理善偕衆擊走之又屢敗之朱橋范村及餘杭臨安富陽五年隨大將軍譚泰赴江西勦叛鎮金聲桓復南昌七年九年三遇

恩詔晉世職至一等輕車都尉又一雲騎尉十三年二月

任叅領十五年隨信郡王多尼征雲南十六年明桂王朱由榔竄緬甸其舊將高應鳳結元江土司那嵩負固抗拒達理善與都統卓羅前鋒統領白爾赫圖等攻克元江城那嵩自焚死擒高應鳳斬于軍康熙二年敘功晉爵三等男尋以老乞休十三年十二月陝西提督王輔臣叛于寧羌達理善請往軍前効力

命署副都統率八旗每佐領下兵三名赴西安十四年二

月由西安至隴州仙逸關時輔臣留賊黨踞秦州
自引兵退舊駐之平涼偽總兵高鼎蔡元率馬步
賊四千自關山河岸迎戰達理善同前鋒統領穆
占將軍佛尼勒等率兵進攻賊潰走追擊五十餘
里復關山關三月復同穆占等自清水縣進距渭
河橋二十里遇賊哨擊敗之乘勝奪橋抵秦州立
營秦州賊二千出城衝突達理善揮軍夾擊賊敗
入城四月分兵攻東關克之四川叛鎮吳之茂引

賊萬餘援平涼逼秦州城結寨城內賊八千餘出
應合犯我營達理善時已病猶督兵力戰大破賊
衆尋卒于軍

賜祭奠如例謚曰武毅二十五年兵部彙敘陝西軍功以
達理善紀功二次例不晉職奏得

旨達理善巴圖魯係告老解任之員後願隨征盡心効力
著有勞績又病故行間殊為可憫不拘定例給一世職
于是予雲騎尉合前三等男晉為二等男以其孫

留占襲四十四年十二月留占任冠軍使兼一等待衛
因庸懦解退部議銷去

恩詔所加職改一等輕車都尉另襲得

肯達理善巴圖魯本有成勞致仕後復從軍効力免其銷
去原職仍以留占之弟岱奇里襲二等男

根特

根特滿洲正黃旗人姓納喇父達雅理

國初來歸以軍功授騎都尉遞加一等輕車都尉卒

以其孫達漢泰襲根特初以閒散隨貝勒阿巴泰
征明至山東攻泗水縣先登還攻定州先登敘功
授騎都尉兼一雲騎尉世職

賜巴圖魯號尋晉三等輕車都尉順治元年授刑部理事
官五年三月隨征南大將軍譚泰征叛鎮金聲桓
於江西七月大兵薄南昌圍之未下根特由城南
繼蒙古兵登城拔之聲桓中二矢死生擒其黨王
得仁江西平師還擢副都統兼管佐領七年九年

兩遇

恩詔晉世職為一等輕車都尉康熙十二年十一月逆藩

吳三桂叛十三年正月

命都統尼雅翰為鎮南將軍與兗州副都統瑪哈達同赴

安慶根特代駐兗州二月

上以江西界福建廣東湖南為三省要地

命根特偕副都統席布率兵速赴南昌三月江西巡撫董

衛國疏報湖南長沙失守江西袁州吉安二府與

接壤請撥兵駐防得

旨著根特率現駐南昌兵往相機勦禦尋

命內大臣希爾根為定南將軍帥師赴江西根特叅贊軍

務四月平南王尚可喜疏言吳逆遣賊二萬屯黃

沙河叛鎮孫延齡欲與合請就近撥兵會勦孫逆

分賊勢

諭曰根特候希爾根等兵至江西即率所部官兵速赴廣

東是月授平寇將軍會逆藩耿精忠叛於福建

詔根特由廣東仍返江西六月衛國疏報叛弁柯昇勾閩賊竊據廣信諸處

詔根特先定廣信再偕前鋒統領舒恕由袁州進取長沙七月兩廣總督金光祖疏報廣西梧州失守

諭曰根特等兵由袁州取長沙進廣西以襲賊後則取道廣東必致遲久其與平南王尚可喜總督金光祖提督馬雄會同酌議添發官兵規取橫州否則固守梧江諸處相機勦禦八月卒於軍二十二年

賜祭葬如例子智宏襲世職

卦喇

卦喇滿洲正黃旗人姓伊爾根覺羅世居界藩
國初來歸由前鋒校給世管佐領屢從征伐崇德三
年授兵部副理事官尋署副都統七年大軍征明
至黃崖口卦喇偕都統譚泰從山右奪隘進圍薊
州敗明總兵白廣恩等兵順治元年隨睿親王多
爾袞入山海關破流賊李自成二年敘功給騎都

尉世職三遇

恩詔遞加二等輕車都尉授副都統六年四月

命偕叅領羅碩赴太原駐防時叛鎮姜瓖黨陷汾州

諭固守太原卦喇于城南八十里立營偵賊攻清源縣偕

羅碩分路奮擊斬首五千餘級餘衆潰走五月偽

巡撫姜建勲擁衆犯太原卦喇等迎擊之斬級千

餘賊立寨晉祠堡據險不退會端重親王博洛統

兵至卦喇隨大軍破賊營斬萬餘級八月賊衆犯

壽陽縣卦喇率兵援勦復大破之康熙十三年以老病乞休十五年卒子烏爾禪襲世職

圖喇

圖喇滿洲正黃旗人姓舒穆祿世居琿春初任兵部筆帖式

太宗文皇帝崇德七年隨饒餘貝勒阿巴泰征明山東攻泗水縣流矢中目戰愈力攻新泰等城奮勇爭先世祖章皇帝順治元年隨豫親王多鐸征陝西二年復隨

征江南七年擢兵部主事兩遇

恩詔予騎都尉世職十二年擢兵部郎中十三年隨都統
伊勒德征舟山偽伯阮思率巨艦百餘拒戰圖喇
與副都統根特擊敗之阮思復糾其黨陳六御張
洪德等合兵三萬餘犯我舟師圖喇與副都統柯
永綦連敗其衆圖喇中礮傷手足舟山既平敘功
加一雲騎尉十八年山東土賊于七倡亂

聖祖仁皇帝命圖喇同郎中察奇至棲霞逮鞠賊黨時于

七據棲霞之岨嶠山其黨段忠續林萬鵬龐應魁
高起英各擁衆數千分據鰲山潛結棲霞城中奸
黨為內應圖刺邏獲賊諜二人詰之盡得賊情適
靖東將軍濟什哈帥師抵萊陽圖刺遣使約濟什
哈調綠旗兵七百疾馳至棲霞獲城中從賊者三
百餘人遂趨鰲山忠續萬鵬等聞風遁擒賊黨六
十餘獲牲畜以數百計尋偕察奇還京擢大理寺
少卿康熙二年五月授駐防杭州副都統十月同

總督趙廷臣至定海招降海賊鄭錦之偽靜波將
軍阮美及偽官一百二十餘員兵二千九百餘七
年擢杭州將軍十三年三月逆藩耿精忠叛圖喇
奉

詔與總督李之芳提督塞伯哩率滿漢官兵相機防勦尋
以都統賚塔為平南將軍赴衢州禦賊

命圖喇駐守杭州兼防海疆六月疏言杭州兵少請增兵
協守

詔移江南綠旗兵五千駐杭州又疏請杭州增設防禦每
旗各一員下部議如所請尋以病還京十月卒
賜祭葬如例子德明襲職

沃內

沃內滿洲正黃旗人姓性佳世居貝歡山沁地祖
福瑚

太祖高皇帝時來歸

太宗文皇帝崇德三年沃內隨睿親王多爾袞征明毀董

家口邊牆進師越燕京攻定州沃內先登克城
賜號巴圖魯予騎都尉兼一雲騎尉世職尋授叅領

世祖章皇帝順治三年隨端重親王博洛征明唐王朱聿
鍵師至福建其總兵姜正希率兵二萬迎戰沃內
先衆擊敗之六年隨大軍討叛鎮姜瓖敗賊兵於
寧武關賊據左衛城以馬步兵萬餘拒敵沃內率
所部擊卻其衆復擊賊於遼州連戰皆捷還攻左
衛城沃內衆顏垣先登克之敘功復遇

恩詔晉世職至一等輕車都尉兼一雲騎尉

聖祖仁皇帝康熙八年遷正黃旗滿洲副都統十二年擢

盛京將軍奏請增設每旗防禦各一員得

旨允行十四年察哈爾布爾尼叛沃內以其事疏報

上命寧古塔將軍巴海同沃內固守

盛京以信郡王鄂扎為撫遠大將軍統師往討平之

十七年

上以沃內當布爾尼叛時未立軍功

命解將軍任三十年卒

賜祭奠如例以其孫赫英襲世職

喀蘭圖

子察琿

喀蘭圖姓博爾濟吉特先世居克魯倫地

太宗文皇帝時隨其兄額爾格勒珠爾率屬來歸隸正黃旗蒙古尋授一等待衛順治二年

世祖章皇帝以喀蘭圖素荷

太宗眷顧予騎都尉世職七年九年三遇

恩詔晉世職至二等輕車都尉先是睿親王多爾袞請

上幸其第喀蘭圖方退直聞扈從內大臣及侍衛等不及

二十人即持弓矢趨至密為防衛及睿親王獲罪

上嘉喀蘭圖忠誠

賚金帛鞍馬及屯莊改隸正黃旗滿洲晉世職一等後以

扈

駕行圍遲誤仍降二等輕車都尉十五年授散秩大臣尋

擢內大臣

聖祖仁皇帝康熙八年擢理藩院尚書九年奉

命往科爾沁烏珠穆沁等外藩盟會十年以老乞休

上念其勞績素著允解任仍授為內大臣加太子太保十

二年三月卒

賜祭葬如例謚敏壯以其子察琿襲先是察琿已襲額爾

格勒珠爾之騎都尉兼一雲騎尉世職至是合為

三等男康熙十三年隨安親王岳樂討逆藩吳三

桂至江西袁州擊賊鈴山岡賊將馬寶領衆萬餘

列礮拒敵察琿力戰歿於陣議卹追晉二等男

賜祭葬如例無子以喀蘭圖弟之子恩克襲爵

圖海

圖海滿洲正黃旗人姓馬佳父穆哈達世居綏芬
圖海初由筆帖式加員外郎銜順治二年改國史
院侍讀八年遷秘書院學士九年

恩詔予騎都尉世職越歲授宏文院大學士列議政大臣
十二年加太子太保

命攝刑部尚書事明年考滿加少保十五年

命同大學士巴哈納等校訂律例旋以承審江南鄉試作
弊事遲延削加銜明年侍衛阿拉那與公額爾克
戴青家奴毆於市刑部審理失實

上詰問圖海不以實對下廷臣察議以其負恩溺職論死
奉

旨寬免削職十八年正月

世祖龍馭上賓遺命起用

聖祖仁皇帝御極卽於是年授正黃旗滿洲都統康熙二年七月蜀流賊郝搖旗劉體純李來亨等嘯聚湖廣鄖襄山中

命為定西將軍副靖西將軍都統穆里瑪率禁旅會楚蜀之師討之至則與總督李國英提督鄭蛟麟總兵俞奮起于大海署護軍統領根特等連營困之賊以兵三千犯奮起營圖海率兵邀擊敗之賊又連犯諸營各分兵夾擊咸潰敗未幾郝搖旗為副都

統杜敏擒斬於黃草坪劉體純亦相繼破滅惟李
來亨擁衆據茅麓山恃險負固圖海等率兵圍之
絕其聲援外則搜勦餘寇畧盡賊勢窮蹙來亨闔
門自經死偽公侯將軍以下偽官五百八十餘員
兵八千八百餘名降執斬偽新樂王及偽官七人
兵六十一人俘其家口三千餘衆而還六年晉宏
文院大學士加世職為一等輕車都尉會纂修

世祖章皇帝實錄充總裁官七年

命測儀象八年

命錄刑部重囚並稱

旨九年奏乞解機務專力戎行

上慰留之十一年

命清理刑獄十二年冬吳三桂叛十三年耿精忠亦叛

聖祖以籌餉需才

命攝戶部尚書十四年三月疏請

勅禁外省軍需不得私派夫役不得先期拘集錢糧不得

額外科欽詞訟重者速審速結小者不得濫准滋
累衙蠹土豪不得魚肉善良奉

旨先行是月察哈爾布爾尼劓其父阿布奈以叛圖海奉
命為副將軍同撫遠大將軍信郡王鄂札率師往討四月
師次達祿布爾尼設伏山谷而以兵三千人來拒
我師我師進攻伏發撓我土默特兵圖海分兵迎
擊賊以四百騎繼至力戰殲之布爾尼乃悉眾出
用火器拒戰圖海令嚴陣以待賊敗復聚連擊大

破之招撫人戶一千三百餘布爾尼僅以三十騎遁去時科爾沁額駙沙津以兵會勦遇布爾尼於扎魯特境追及斬之察哈爾平班師

聖祖御南苑之大紅門迎勞之敘功晉一等男十五年二月

聖祖以貝勒洞鄂攻叛將王輔臣於平涼未克

命圖海為撫遠大將軍率護軍每佐領各二名赴陝總轄全省貝勒洞鄂以下咸聽節制三月至平涼明賞

罰申約束軍威大振賊衆聞之懼諸將請乘勢攻城圖海曰仁義之師先招懷而後攻伐吾奉

天威討茲凶豎無慮不克顧念城中數十萬生靈無非

朝廷赤子遭賊刼持至此覆巢之下殺戮必多俟其
向化歸誠以體

聖主好生之德不更美乎城中軍民聞者莫不感泣咸思
自拔以出賊勢由是日蹙五月奪虎山墩虎山墩
者在平涼城北高數十仞賊守以精兵通西北餉

道圖海曰此平涼之咽喉也得此則餉道絕城不
攻而下矣即率兵仰攻賊萬餘列火器以死拒戰
圖海令兵番休迭進自己至午戰益奮斬偽總兵
二人賊被殺及墜崖死者無算遂奪其墩據之俯
視城中如在掌握因發大礮擊其城中營城中洵
懼輔臣乃乞降隨以其情

上聞

詔赦輔臣罪撫慰之六月圖海劄授七品官周昌為叅議

道賁

詔入城翼日輔臣遣偽布政使龔榮遇等率士民獻軍民冊又遣其子繼正等繳所受吳逆偽敕印劄然猶疑懼觀望圖海復令周昌同其兄子前鋒侍衛保定往諭輔臣乃率衆薙髮降圖海令副都統吳丹入城撫定秋毫無所犯平涼被圍日久城中食盡加以鋒鏑之餘死亡過半因令地方官賑窮乏掩胔骸其老弱之轉徙不能歸者遣將士分送安插

遠近帖然初周昌往招輔臣時言昌母孫氏殉節死願以身報國為母請旌因請往至是奏旌其母又奏蠲秦省被兵及轉饟各州縣賦皆從之是月遣振武將軍佛尼勒敗賊將吳之茂于牡丹園又敗之於西和縣北山將軍穆占進攻樂門敗賊於紅崖復禮縣於是固原偽巡撫陳彭慶陽偽總兵周養民嘉峪關偽總兵王好問關山偽副將孔蔭雄共率偽官九百餘員兵四萬八千餘名相繼降

關隴志平八月奉

上諭圖海器識老成才猷練達贊襄機務宣力

累朝以文武之長才兼忠愛之至性勞績茂著克副倚任
朕心深為嘉悅於軍功議敘外應從優加恩以示朕眷
注忠勤酬答勲庸至意遂晉封三等公世襲罔替時漢
中興安賊猶據守平涼慶陽初定人心未寧奏請
宜分兵防守諸隘緩攻漢興別遣一旅赴湖廣會

勦吳逆奉

旨令圖海親率精銳以行圖海以陝西反側未安慮有變
九月疏陳其狀

聖祖因授穆占為都統佩征南將軍印率師赴楚留圖海
鎮守陝西十二月議取漢中興安奏調綠旗兵檄
提督孫思克赴秦州趙良棟赴鳳翔以將軍侯張
勇將軍王進寶各引兵助之期以明年正月二十
日如所約至下張勇等會議以

聞勇等謂宜視夏秋收穫豐歉再圖進取圖海以漢興山

路險峻夏秋多霖潦賊守益堅請如前奏十六年

正月議上

上慮克復漢興後宜設重兵轉饟不易若俟夏秋則頓師
縻饟亦屬非計

諭令守諸要隘分兵赴荊州會勦吳逆議遂寢三月招撫
韓城等縣偽總兵喬斌以下官百有餘員四月遣
兵進逼禮縣驛門先後敗賊於五盤山喬家山塘
坊廟芭蕉園沙窩諸處復塔什堡是年九月

賜服物並

御製詩二章十七年二月奏請分兵兩路進取漢中興安

旋奉

密諭止之閏三月將軍佛尼勒等敗賊於牛頭山香泉四

川總督周有德等敗賊於秦嶺復潼關堡五寨四

月慶陽賊袁本秀受吳逆偽劄作亂圖海發慶陽

宜君延安三營兵會王進寶兵討之斬本秀於衛

遠溝餘衆潰散十二月疏請輕騎赴京面奏事宜

許之十八年二月還陝五月賊犯棧道益門鎮各口奏請提督趙良棟進臨武寨相機而行俟擊破賊壘分道征進時湖廣廣西平

聖祖諭亟殲寶雞之賊恢復漢興以平蜀地七月破益門鎮賊賊毀偏橋兵不得進疏其狀以

聞

聖祖以其怯懦易退嚴督之九月進取漢中興安分兵四路圖海親率將軍佛尼勒等由興安進總兵官程

福亮為後援駐守舊縣關諸路將軍畢力克圖提督孫思克等由畧陽進總兵官朱衣客為後援駐守西河諸路將軍王進寶總兵官費雅達等由棧道進總兵官高孟為後援駐守寶雞提督趙良棟由徽縣進尅日並發十月圖海師次鎮安縣分兵為二隊進攻偽總兵王遇隆於火神崖敗之渡乾玉河奪梁河關偽將軍韓晉卿遁入四川是月王進寶復漢中趙良棟復徽縣畧陽畢力克圖復成

縣又復階州降偽副將王先生以下官十九員兵
三百六十名十一月復興安降偽將軍謝四偽總
兵王永世以下官三百八十二員兵萬四千三百
餘名平利紫陽石泉漢陰洵陽白河及湖廣竹山
竹溪上津等縣皆下之是月畢力克圖遣叅將康
調元復文縣偽洮泯道王文衡降先是王進寶趙
良棟捷奏先至

聖祖以圖海畢力克圖等遲緩切責之至是捷

聞得

旨嘉獎下部議其功尋

命率大軍之半駐守鳳翔十九年正月

命赴漢中轉饟以濟蜀師九月陝西總督哈占由保寧江

直上擊賊譚宏

命發兵為聲援以分賊勢是月獲奸民楊起隆初起隆於

康熙十二年詐稱為朱三太子謀作亂於京師正

黃旗周公直家奴陳益聚數十人於家將起應之

公直首其事圖海即率兵圍之陳益等悉就縛至是并獲起隆送京師二十年正月賊犯四川敘州諸處調副都統翁愛率所部兵往援復奏請親行諭仍駐漢中防守秦蜀七月以疾還京尋具疏乞休

聖祖慰留之十二月卒累官至太子太傅中和殿大學士兼吏部尚書正黃旗都統封三等公世襲諡文襄賜祭奠如典禮明年

太宗文皇帝實錄告成以圖海曾充監修總裁官追贈少

保仍兼太子太傅二十二年

御製碑文立石墓道雍正二年加贈一等忠達公配享

太廟尋

命建專祠復

御製文刻石以旌之崇祀陝西名宦子諾敏襲爵見大臣

表

覺羅武默訥

覺羅武默訥滿洲正黃旗人

景祖翼皇帝第三兄索長阿之元孫也順治四年七月授

雲騎尉職屢遇

恩詔洊晉三等輕車都尉任二等侍衛康熙三年遷一等

侍衛六年五月擢內大臣九年二月管佐領十六

年四月

命同侍衛費耀色塞護禮索萬瞻視長白山

諭曰長白山係本朝

祖宗發祥之地爾等前赴吉林選取識路之人瞻視明白

酌議行禮並巡視寧古塔等處可於大暑以前馳驛速往五月四日巳卯武默訥發京師巳丑至

盛京辛卯東行戊戌抵吉林詢無知長白山路者得舊居額赫訥殷地獵戶岱穆布魯言其父曾獵長白山麓負鹿歸道經三宿似離額赫訥殷不遠由吉林至額赫訥殷陸行十日舟行幾倍之於是寧古塔將軍巴海運米十七艘於額赫訥殷六月丁未武默訥等携三月糧與協領薩布素由陸行經

溫德亨河庫呼訥嶺奇爾薩河布爾堪河納丹佛
呼城輝發江法河卓隆鄂河抵訥殷江干米亦至
乃乘小舟與薩布素分路行由訥殷江逆流上丙
寅會於額赫訥殷一望深林無路薩布素領衆前
行伐木開道遣人回告行三十里至一山頂緣木
而望長白山乃在百餘里外片片白光見之甚明
越二日戊辰武默訥前行次日遇薩布素於林中
十七日壬申黎明雲霧迷漫莫辨山在何處忽聞

鶴鳴六七聲尋聲前適遇鹿蹊循至山麓見一處
周圍密林中平坦而圓有草無木前臨水林盡處
有白樺木宛如栽植者於是移駐步林外仍迷霧
無所見跪誦

敕旨禮拜畢忽雲霧開散山歷歷分明有路可躋遙望山
形長濶近觀則中圓平若臺基向所見白光積氷
雪也山高約百餘里頂有池五峯環繞臨水而立
正南一峯稍低宛如門戶池廣袤約三四十里上

間處處有水由左流者為松花江右流者為大小
訥殷河繞山皆平林武默訥等禮拜而下峯頭有
鹿羣奔逸仆其七若有推墜者時上山七人方乏
食乃謝山靈所賜退行二三十步倏然雲起癸酉
回至前望處終不復見山光矣庚辰至恰庫河馬
疲甚甲申自恰庫河乘舟回經色克騰圖伯赫噶
爾漢噶達渾薩滿薩克什法克什多琿諸河至松
花江七月丁丑回吉林巡視寧古塔各地方八月

乙丑還京疏

聞

諭曰長白山奇蹟甚多山靈宜加封號永著祀典以昭國家茂膺神貺之意於是禮臣同內閣議上

詔封長白山之神秩祀如五嶽十七年正月

命武默訥齋

敕往封歲時望祭如典禮十九年

召武默訥入養心殿


命工繪其像以

賜

諭曰將此像給爾子孫世世供享以昭加恩之意二十九

年卒

賜祭奠如例



欽定八旗通志卷一百四十九